



HEXAS  
COLLEGIORUM PHILOLOGICORUM  
ORIENTALIUM,

I. Analytici. II. Cursorii. III. Metaphrastici.  
IV. Polyglotti. V. Rabbinici. VI. Critici.

adhuc apertorum, & ipsis hisce *schedis* indicatorum  
atque delineatorum.

P R Æ F A T I O.

**H**Uic quivis Bonarum Artium *Magister* creatus & in Academiis pronunciatus, pro concessa sibi per *Magisterii Honores ac Privilegia* facultate & autoritate, tam in Philologia quam Philosophia, etiam habere possit *Collegia*; & præterea quoque prælegendi sæpius *Ducalis Stipendii nostri Ordines*, non singulis modo *Philosophia Magistris*, sed imprimis etiam in eo *Repetentium* munere fungentibus, varia aperire *Collegia* diserte concedant: ego tamen, à variis licet jam pridem admonitus, & nominis quidem magni Viris, *Philologica & Orientalia* maxime, in quibus me satis diu, nec infeli-

feliciter aliorum iudicio, exercueram, Collegia prius habere nolui, quam & *Repetens, Serenissimi Principis Gratia*, constituerer, & ipso etiam ordine, tum temporis, tum novæ illius Societatis, cui modo Collega adscriptus fueram, me quasi denuo vocante, singularem *Literas Ebraicas repetendi* atque curatius tractandi *Spartam* meis impositam esse humeris iudicare tenerer. Equidem nulla unquam vel *Claustralis* vel *Academica vita* meæ particula ab *informationis privata officio* vacavit, vel vacare etiam potuit; dum quamplurimis, sed singulis semper, quibus & ab aliis eram commendatus, & mea in tradendo Ebraico studio opera visa fuit expetenda, pro viribus inservire debui: verum, à *Collegiis Philologicis*, eodem cursu pluribus diversi ingenii auditoribus habendis, & iisdem, prius ad talem laborem technis subdolis militum instar conductis, spontaneo ausu offerendis, aut more propolarum etiam venum exponendis, mentem meam jugiter abstraxi & retardavi; dum tandem meum aliis officium honeste profiteri, ipsa *muneris*, quod gerebam, *ratio*, & venerabilis mihi *Superiorum voluntas*, & vel maxime *Illustris quoque Senatus nostri Ecclesiastici auctoritas*, graviter imperarent. Habui igitur proxime elapsorum *quatuor annorum spatium*, quo *Repetentis personam* tueor, varia & numero quidem *XII. Collegia Philologica Orientalia*: nimirum, *I. Fundamentale Grammaticum*, *I. Generale Philologico-Criticum*, *III. Analytico-Synthetico-Accentuatoria*, *III. Cursoria Biblica*, *Vetus Testamentum absolventia*, *I. Metaphrasticum*, versiones cum fontibus conferens, *I. Polyglottum Orientale*, *Linguarum & Translationum Orientalium rationem ac usum monstrans*, *I. Rabbinicum*, diversorum scriptorum Rabbinicorum utilitatem in sacra Philologia comprobans, & tandem

I. Criticum, Orthodoxum V. T. Textus Hebraici Originalis Criticum formans. *Dimidia dictorum Collegiorum pars his ipsis, quas Hexas hæc Collegialis heic exhibet, schedis aut programmatibus, abs me Venerabili ac Præstantissimo Dominorum Stipendiariorum cætui indicatâ atque oblata, & dein, cum quosdam semper, quantumvis raros, invenisset amatores, in Illustri Stipendio nostro etiam habita fuit: alia autem VI. ex recensitis modo XII. istis, potissimum repetita, à nonnullis, meam sibi operam utilem porro fore judicantibus, ultro etiam à me desiderata sunt & requisita. Jam quidem perfecta omnibusque numeris absoluta nuncupare hæc mea Schemata nequaquam ausim; qui probe sciam, quod hic modo mihi præfixus fuerit scopus, ut tractandorum summa, series atque methodus, & mihi, & futuris in aliquo studiorum istorum sodalibus generatim tantum versaretur ob oculos. Veruntamen, cum & hoc me non fugiat, me consignatis hisce & propria meditatione hunc in ordinem congestis Collegiorum Formulis actum haud agere, vel aliorum arare tantum vitulo: operæ pretium me speravi facturum, si memoratas sex schedas istas, præ reliquis etiam, publicis divulgarem typis; ut, cum eas primum videntes nostri Stipendii Dn. Superattendentes plurimum Reverendi non habuerint indignas, quas aliis uberiore declaratione explanarem, forsitan & deinceps quidam propositum istiusmodi Typum, vel pralucente alio Duce idoneo, vel proprio etiam Marte faciliq̃ Minerva sibi sequendum, aut aliqua parte imitandum eligerent; saltem eorum nonnulli, qui me filium istud, à me primo textum, lubenter pertexere viderunt & audiverunt, summa tractatorum capita in memoriam sibi eo facilius revocare possent. Scribebam Tubingæ in Alumneo Ill. Stipend. Theol. d. 28. Febr. A. 1729.*